



1. november 2011

Inatsisartut Suleriaasianni § 37 naapertorlugu Naalakkersuisunut apeqquq imaattoq matumuuna saqqummiuppara:

Naalakkersuisunut apeqquq:

Nereriaannarnik kalaaliminernik kalaaliaqqani nioqquteqartarneq pillugu apeqquqit pingasut.

(Inatsisartuni ilaasortaq Astrid Fleischer Rex, Demokraterne)

Tunngavilersuut

Februarimi § 37 naapertorlugu apeqquteqaateqarpunga kalaaliaqqap kalaaliminernik nereriaannarnik nioqquteqarsinnaannginneranut tunngasumik, soorlu paarnaqutinik pujuukkanik eqalunnik imaluunniit panertunik nikkunilluunniit.

Inuussutissarsiornermut Naalakkersuisoq Ove Karl Berthelsenip akissummini ilisimatitsissutigaa, sulliviit inuussutissalerisut pillugit nalunaarutip atuuttup allannguutissaa piaarnerpaamik tusarniutigineqalersoq, taamaasilluni kalaalimerngit suliareriikkat ilaat kalaaliaqqami nioqqutigineqarsinnaanngorniassammata, inuussutissalli isumannaatsuunissaat ataqqillugu.

Qaammatit pingasut qaangiutiinnartut – ulloq 1. juni 2011 – nalunaarutissamut nutaamut siunnersuut nassiussuunneqarpoq tusarniutigineqarluni, Naalakkersuisut saqqummiussassatut siunnersuutaat ilanngullugu. Siunnersuutini taakkunani marlunni takuneqarsinnaavoq nereriaannarnik kalaalimineerniarfinni killeqarluinnartumik nioqquteqarsinnaaneq Naalakkersuisut allanngortilersaaraat. Kalaaliaqqani akuerisaasumik kalaaliminilerineq eqqarsaatigalugu taamaallaat ullumikkut erisartoqarsinnaavoq, saliisoqarsinnaavoq uullisoqarlunilu. Tamatumali saniatigut Naalakkersuisut eqqarsaatigaat kalaalimineerniarfinni nereriaannanngorlugit suliat aamma nioqqutigineqarsinnaalissasut soorlu nikkut panertullu kiisalu neqit aalisakkallu tarajortikkat.

Taamaasillutik Naalakkersuisut, Nuummi kalaaliaqqap nutaap ammarnersiorneqarneranut atatillugu kalaalimerngit nioqqutigineqarsinnaasut killeqarpallaarnerat pillugu isornartorsiorneqarnertik



iluarsiivigaat. Ilaannakuuvorli.

Tamanna tungavigalugu Naalackersuisut qinnuigissavakka apeqqutit makku akeqqullugit:

1. Qerititsisarneq

Nalunaarummi allannguutissatut eqqarsaatigineqartumi inuussutissanik qerititsisarnissaq ilaatinneqanngilaq.

Naalackersuisut isumaqarnerlutik inuussutissanik qerititsineq panersiinermut tarajorterinermullu naleqqiullugu toqunartunitsitsisassasoq?

2. Pujoorineq

Pujoorineq tarajorterinertut panertitsinertullu nerisassanik illersuineruvoq. Nalunaarummi allannguutissatut eqqarsaatigineqartoq tungavigalugu kalaalimineerniarfiit periarfissaqalissapput tarajortikkanik panertunik nikkunillu nioqquteqartalernissaat taamaakkaluartorli pujuukkanik nioqquteqarnissaq suli inerteqqutaasussaavoq. Tassa imaappoq, atuisartut qangatut paarnaqutinik pujuukkanik mamarluinnartunik kalaalimineerniarfinni pisisinnaassanngillat.

Naalackersuisut isumaqannguatsiarput, kalaalimineerniarfinni pujuukkanik nioqquteqarnissamut akuersissagaluarunik nerisassat toqunartunitarnerat ingasannerulissasoq. Nuummili ukiorpassuarni (aamma qularnanngilaq nunap ilaani allani) immikkut akuersissummik peqanngikkaluartut eqalunnik kapisilinnillu pujuukkanik nioqquteqartuarnikuupput. Aamma amerlaqisut nammineq nerisassaminnik pujoorisarput.

Naalackersuisut nalunngisaqarnerlutik tamatuma kinguneranik toqunartunittoorsimasoqarneranik?

3. Paarnat kuannillu

Naalackersuisut saqqummiussassaattut siunnersuummi, tusarniaanermut atortunut ilanngunneqartumi, malunnarpoq Naalackersuisut isumaqartut kalaalimineerniarfinni paarnanik kuanninillu nioqquteqartarneq inuussutissalerisut sulliviit pillugit nalunaarummik atuuttumik unioqqutitsinerusut. Siunnersuummimi makku oqaatigineqarput:



”Nunarsuarmi piviusumi nerisassalerinermi killilersuutigineqartut malinneqarneq ajorput ilaatigut nioqqutigineqartarmata aalisakkat panertut kiisalu immani nunamilu miluusimasut neqaannik nikkuliat, tarajortikkat aamma pujuukkat taamatulu paarnat naatitallu. Nuummi nalunaarusiaq unioqqutinneqartarnikuvoq Nuutoqqami kalaaliraasimasuni. Kommuneqarfik Sermersoorli kalaaliarartaami tuniniaanermik ingerlatsisuusup, malittarisassat atuuttut malillugit ingerlatsivoq”

Naatsorsuutigaa ”paarnat naatitallu” eqqaaneqarmata pineqartut paarnat kuannillu. Takujuminaatsipparali paarnanik kuanninillu nioqquteqarneq nalunaarummik unioqqutitsinerusinnaanerit. Aalajangersagaqanngilaq Kalaalimeerniarfinni kalaalimerngit nioqqutigineqarsinnaanerit killilersuisumik eqqaassanngikkaanni nerisassat uumasunik pisunik akullit eqqaassanngikkaanni (aalisakkat, qaleruallit, timmiarussat aamma miluumasut).

Nalunaarutip § 1-ata imm. 8-aani paarlattuanik erserpoq, maaniinnaq paarnanik naatitanillu nioqquteqarneq nalunaarutip kapitel 15-ani pineqartoq, tassani pineqarmat kalaalimeerniarfinni inuussutissanik tuniniaaneq. Taava imaassimassaaq kuannernik paarnanillu kalaalimeerniarfinni nioqquteqarneq ajornanngitsoq, minnerunngitsumik kalaalimeerniarfik silami inissisimappat.

Allamik inatsiseqarnerluni kalaaliaqqap silataani paarnanik kuannernillu nioqquteqarnissamut inerterisumik? Taava aamma qanoq ippa kalaaliaqqap iluani?

Apeqqutit akeqquneqarput piffissarititaasup ullut sulliviit qulit nalignnaasut iluanni.